

四庫全書

經部

欽定四庫全書

日講春秋解義卷四十三

襄公

二十有四年春叔孫豹如晉

左傳

二十四年春穆叔如晉

賀克藥氏

范宣子逆之問焉曰

古人有言曰死而不朽何謂也穆叔未對宣子曰昔

勾之祖自虞以上為陶唐氏

陶唐杜注堯所治地大原晉陽縣也

在夏

為御龍氏

謂劉累事見昭二十九年

在商為豕韋氏

豕韋杜注國名東郡白馬

縣東南有韋城在今直隸滑縣東南在周為唐杜氏唐杜杜注二國名殷末豕韋國于唐

周成王滅唐遷之于杜為杜伯杜伯之子隰叔奔晉四世及士會食邑于范復為范氏杜京兆杜縣今陝

西西安府治東南有杜陵故城晉主夏盟為范氏其是之謂乎言己世為

興穆叔曰以豹所聞此之謂世祿非不朽也魯有先

大夫曰臧文仲既沒其言立立謂不廢絕其是之謂乎豹

聞之大上有立德堯舜其次有立功禹其次有立言

史佚周仕臧文仲雖久不廢此之謂不朽若夫保姓受氏以

守宗祔世不絕祀無國無之祿之大者不可謂不朽

傳善穆叔  
之知言

附錄  
左傳

范宣子為政諸侯之幣重鄭人病之二月鄭伯

如晉子產寓書于子西以告宣子

子西相鄭  
伯如晉故

曰子為

晉國四鄰諸侯不聞令德而聞重幣僞也惑之僞聞

君子長國家者非無賄之患而無令名之難夫諸侯

之賄聚于公室則諸侯貳若吾子賴之

賴恃  
用之

則晉國

貳諸侯貳則晉國壞晉國貳則子之家壞何沒沒也

沒沒沈  
滅之言

將焉用賄夫令名德之興也

德須令名  
以遠聞

德國

家之基也有基無壞無亦是務乎有德則樂樂則能

久詩云樂只君子邦家之基有令德也夫

詩小雅言君子樂美

其道為邦家之基所以昭令德

上帝臨女無貳爾心有令名也夫

詩大

雅言武王為天所臨不敢懷二心所以獲令名

恕思以明德則令名載而行

之是以遠至邇安毋寧使人謂子子實生我而謂子

浚我以生乎象有齒以焚其身賄也

楚斃也

宣子說乃

輕幣是行也鄭伯朝晉為重幣故且請伐陳也鄭伯

稽首宣子辭子西相曰以陳國之介恃大國

大國楚也而

陵虐于敝邑寡君是以請罪焉敢不稽首

為明年鄭入陳傳

仲孫羯帥師侵齊

左傳

孟孝伯侵齊

孝伯仲孫羯

晉故也

前年齊伐晉故

叔孫豹救晉無功故孟孝伯帥師侵齊為晉報焉

羯代速為御未練而帥師非禮也

夏楚子伐吳

左傳

夏楚子為舟師以伐吳不為軍政

不設賞罰之差

無功而

還

為下吳名舒鳩張本

襄十一年楚失鄭十四年伐吳自是舍鄭不爭又  
十年一再伐吳急吳而緩鄭蓋楚弱而吳張也

秋七月甲子朔日有食之既

春秋三書日食既桓三年以桓王敗宣八年以楚  
莊興是後則中國諸侯皆受盟於楚矣頻月食者  
惟襄二十一年九月十月及此年七月八月歷法  
無此先儒以為傳寫失真不可彊通也

齊崔杼帥師伐莒

左傳齊侯既伐晉而懼將欲見楚子楚子使遽啓彊如

齊聘且請期

請會期

齊社蒐軍實使客觀之陳文子曰

陳須無

齊將有寇吾聞之兵不戢必取其族

戢藏也族類也取其

族還自害也

秋齊侯聞將有晉師

夷儀之師

使陳無宇從遽

啓彊如楚辭

陳無宇齊大夫辭有晉師未得相見

且乞師崔杼帥師送

之遂伐莒侵介根

介根杜注莒邑城陽黔陳縣東北計基城是也

齊既與莒平今復伐之無信已甚崔杼自虛打同

盟久專國政至是假伐莒以竊兵柄篡弑之禍其



所由來者漸矣

大水

夷儀之會以水不克伐齊則知水之所及廣矣非特魯之災也

八月癸巳朔日有食之

公會晉侯宋公衛侯鄭伯曹伯莒子邾子滕子薛伯杞

伯小邾子于夷儀

夷儀公羊作陳儀後同

左傳會于夷儀將以伐齊水不克

會于夷儀帥十二諸侯之師將以討齊然會而不  
伐是有畏也國勢不競衆志不一也曰水不克者  
特辭不能伐爾下書崔杼伐我西鄙盖知晉之無  
能為也

冬楚子蔡侯陳侯許男伐鄭

左傳

冬楚子伐鄭以救齊門于東門次于棘澤

棘澤在今河南

新鄭縣東南

諸侯還救鄭

夷儀諸侯

晉侯使張骼輔蹠致楚師

求御于鄭

二子晉大夫欲得鄭人自御知其地利故也

鄭人卜宛射犬吉

射犬鄭公孫

子大叔戒之曰

大叔游吉

大國之人不可與也

言不

可與等欲使卑下之

對曰無有衆寡其上一也

言在已上者有常分無大小國

之大叔曰不然部婁無松柏

部婁小阜松柏大木喻小國異于大國

二

子在幄坐射犬于外

二子張幣輔蹠

既食而後食之使御廣

車而行

廣車兵車

已皆乘乘車

乘車安車

將及楚師而後從之

乘皆踞轉而鼓琴

轉衣裳踞謂坐其上

近不告而馳之

射犬恨故近敵

不告而馳

皆取胄于橐而胄入壘皆下搏人以投收禽挾

囚弗待而出

射犬又不待二子

皆超乘抽弓而射既免復踞

轉而鼓琴曰公孫同乘兄弟也胡再不謀

謂不告而馳不待而

出對曰曩者志入而已今則怯也皆笑曰公孫之亟

也

亟急也

楚子自棘澤還使遽啓彊帥師送陳無宇

傳言齊楚固相結

吳人為楚舟師之役故

在此年夏

召舒鳩人

舒鳩人叛楚

舒鳩杜注楚屬國

楚子師于荒浦

荒浦杜注舒鳩地

使

沈尹壽與師祁犁讓之

二子楚大夫

舒鳩子敬逆二子而

告無之且請受盟二子復命王欲伐之遽子曰

令尹遽子

馮

不可彼告不叛且請受盟而又伐之伐無罪也姑

歸息民以待其卒卒而不貳吾又何求若猶叛我無

辭有庸乃還

為明年楚滅舒鳩傳

晉合十二國之君畏齊不敢伐而徒致棘澤之役  
以患鄭其無能可知矣諸侯救鄭不書救不及事  
不足錄也

公至自會

陳鍼宜咎出奔楚

左傳陳人復討慶氏之黨鍼宜咎出奔楚

宜咎之事無聞焉而以慶氏之黨逐則其人可知  
矣其後在楚為箴尹宜咎

叔孫豹如京師

左傳齊人城邾

邾王城也于是穀雒關  
毀王宮故為王城之

穆叔如周聘且

賀城王嘉其有禮也賜之大路

為昭四年叔孫以  
所賜路葬張本

據傳穀洛鬪毀王宮齊侯叛晉求媚於天子故為

王城之於是叔孫豹始如京師聘且賀焉襄之聘

晉者九是年春先聘晉冬乃聘王慢甚矣城邾魯

不與故不書

大饑

穀梁傳

五穀不升為大饑一穀不升謂之噍二穀不升

謂之饑三穀不升謂之饑四穀不升謂之康五穀不

升謂之大侵大侵之禮君食不兼味臺榭不塗弛侯

廷道不除

侯射侯廢侯不燕射廷內道路不修除

百官布而不制

官職修列

不可缺廢不更有造作

鬼神禱而不祀此大侵之禮也

二穀不熟曰饑五穀不熟曰大饑古者備荒之政

至纖且悉是年秋雖大水猶未至墮城郭沒倉廩而遽至大饑則知備荒之無政矣

附錄左傳

晉侯嬖程鄭使佐下軍

代樂盈

鄭行人公孫揮如

晉聘

揮子羽

程鄭問焉曰敢問降階何由

問自降下之道

子羽

不能對歸以語然明

然明駸蔑

然明曰是將死矣不然將

以貴而知懼懼而思降乃得其階

階猶道也

下人而已又

何問焉且夫既登而求降階者知人也不在程鄭其

有亡釁乎不然其有感疾將死而憂也

為明年程鄭死張本



二十有五年春齊崔杼帥師伐我北鄙

左傳

二十五年春齊崔杼帥師伐我北鄙以報孝伯之

師也

前年魯使孟孝伯為晉伐齊

公患之使告于晉孟公綽曰

孟公

綽魯大夫

崔子將有大志不在病我必速歸何患焉其來

也不寇使民不嚴異于他日齊師徒歸

徒空也

崔杼懷無君之心鄰國知之而齊莊貪伐國之功

利令知昏豪不覺悟宜其及也

夏五月乙亥齊崔杼弑其君光

傳左齊棠公之妻

棠公齊棠邑大夫

東郭偃之姊也東郭偃臣

崔武子棠公死偃御武子以弔焉見棠姜而美之使

偃取之

為已取

偃曰男女辨姓今君出自丁

齊丁公崔杼之祖

臣出自桓不可

桓公小白東郭偃之祖同姜姓故不可取

武子筮之遇困

三三

坎下兌上困

之大過三三

巽下兌上大過困六三變為大過

史皆曰

吉示陳文子文子曰夫從風

坎為中男故曰夫變而為巽故曰從風

風

隕妻不可娶也

風能隕落物者變而隕落故曰妻不可娶

且其繇曰困于

石據于蒺藜入于其宮不見其妻凶

困六三爻辭

困于石

往不濟也

坎為險為水水之險者石不可以動

據于蒺藜所恃傷也

坎為

險兌為澤澤之生物而險者蒺藜恃之則傷

入于其宮不見其妻凶無所

歸也

六三失位無應則喪其妻失其所歸也

崔子曰蒺也何害先夫當

之矣

寡婦曰蒺言索公已當此凶

遂取之莊公通焉驟如崔氏以

崔子之冠賜人侍者曰不可公曰不為崔子其無冠

乎崔子因是又以其閒伐晉也曰晉必將報欲弑公

以說于晉而不獲閒公鞭侍人賈舉而又近之乃為

崔子閒公

伺公閒隙

夏五月莒為且于之役故莒子朝于

齊

且于役在二十三年

甲戌饗諸北郭崔子稱疾不視事

欲使公來

乙亥公問崔子

問疾

遂從姜氏姜入于室與崔子自側

戶出公拊楹而歌

歌以命姜

侍人賈舉止衆從者而入閉

門

為崔子閉公重言侍人者別下賈舉

甲興公登臺而請弗許請盟弗

許請自刃于廟弗許皆曰君之臣杼疾病不能聽命

近于公宮

言崔子官近公宮或淫者詐稱公

陪臣干掇有淫者不知

二命

干掇行夜言行夜得淫人受崔子命討之不知他命掇夜戒有所擊也

公踰牆又

射之中股反隊遂弑之賈舉州綽邠師公孫敖封具

鐸父襄伊儻堙皆死

此非侍人賈舉也八子皆齊勇力之臣為公所嬖者

祝佗

父祭于高唐

祝佗父莊公之嬖高唐齊別廟

至復命不說弁而死于

崔氏

爵弁祭服

申蒯侍漁者

侍漁監取魚之官

退謂其宰曰爾以

帑免我將死其宰曰免是反子之義也與之皆死崔

氏殺駸蔑于平陰

駸蔑平陰大夫公外嬖傳言莊公所養非國士故其死難皆寵嬖之

人晏子立于崔氏之門外

晏子平仲聞難而來

其人曰死乎曰

獨吾君也乎哉吾死也曰行乎曰吾罪也乎哉吾亡

也曰歸乎曰君死安歸君民者豈以陵民社稷是主

臣君者豈為其口實社稷是養

口實祿養也

故君為社稷

死則死之為社稷亡則亡之若為己死而為己亡非

其私暱誰敢任之且人有君而弑之吾焉得死之而

焉得亡之將庸何歸

將用死亡之義何所歸趣

門啓而入枕尸股

而哭

以公尸枕已股

興三踊而出人謂崔子必殺之崔子曰

民之望也舍之得民盧蒲葵奔晉王何奔莒

二子莊公黨為

二十八年殺慶舍張本

叔孫宣伯之在齊也

宣伯魯叔孫僑如成十六年奔齊

叔孫還納其女于靈公嬖生景公

還齊羣公子納宣伯女于靈公

丁

丑崔杼立而相之慶封為左相盟國人于大宮

大宮大公

廟

曰所不與崔慶者晏子仰天歎曰嬰所不唯忠于

君利社稷者是與有如上帝乃歆

盟書云所不與崔慶者有如上帝讀

書未終晏子抄答易其辭因自歆

辛巳公與大夫及莒子盟

莒子朝齊遇崔

杼作亂未去故復與景公盟

大史書曰崔杼弑其君崔子殺之其

弟嗣書而死者二人其弟又書乃舍之南史氏聞大

史盡死執簡以往聞既書矣乃還

南史氏齊史之在外者傳言齊有直

史崔杼之罪所以聞

閭丘嬰以帷縛其妻而載之與申鮮虞乘

而出

二子莊公近臣

鮮虞推而下之

下嬰妻也

曰君昏不能匡危

不能救死不能死而知匿其暱

匿藏也暱親也

其誰納之行

及奔中

奔中狹道

將舍嬰曰崔慶其追我鮮虞曰一與一

誰能懼我

言道狹衆無所用

遂舍枕轡而寢

恐失馬也

食馬而食

駕而行出奔中謂嬰曰速驅之崔慶之衆不可當也

道廣衆得用故

遂來奔崔氏側莊公于北郭

側瘞埋之不殯于廟

丁亥

葬諸士孫之里

士孫人姓因名里死十三日便葬不待五月

四嬰

喪車之飾諸侯

六不蹕

蹕止行人

下車七乘不以兵甲

下車送喪之車齊舊依上公禮九乘



又有甲兵  
今皆降損

穀梁傳

莊公失言淫于崔氏

放言將淫崔氏為此見弑

齊莊公之難賈舉州綽等十人皆死之而不得以  
死節稱蓋平日從君於昏以致亂亡雖殺身不足  
以償其責也使其中有守義執節之臣將以死諫  
豈肯相隨入崔氏之宮耶但晏嬰號為賢者平時  
知君之必陷於亂亡而不能諫一旦有事則假社  
稷為重以自明其不必死使後世貪生忘義者得

以藉口而先儒或是其言亦習焉而未之察耳

公會晉侯宋公衛侯鄭伯曹伯莒子邾子滕子薛伯杞伯小邾子于夷儀

左傳晉侯濟自泮

泮杜注闕

會于夷儀伐齊以報朝歌之役

朝歌役在二十三年

齊人以莊公說使隰鉏請成慶封如師

隰鉏

朋之魯孫慶封獨使于晉不通諸侯故不書

男女以班賂晉侯以宗器樂

器自六正五吏三十帥三軍之大夫百官之正長師

旅及處守者皆有賂

六正三軍之六卿五吏文職三十帥武職皆軍卿之屬官百官

正長羣有司師旅小將  
帥處守守國者賂財賄

晉侯許之使叔向告于諸侯

公使子服惠伯對曰君舍有罪以靖小國君之惠也

寡君聞命矣

晉會諸侯于夷儀本謀伐齊以報朝歌之役崔杼弑君本以私忿會諸侯之伐遂以莊公之弑自解夫莊公既死則齊可不伐而崔杼覆載不容之惡不可不討使晉能申明大義命齊人及崔氏之宗黨皆安堵而獨有討於杼躬率諸侯進薄於城下

齊之臣庶服義懷德各有奮心杼之力能獨抗乎  
誅其賊置其君以定其國則晉之六卿魯之三桓  
皆有戢志矣不知出此而以賂罷兵此晉霸所以  
遂衰而終以自敝與

附錄  
左傳

晉侯使魏舒宛沒遂衛侯

衛獻公以十四年奔齊

將使衛

與之夷儀崔子止其帑以求五鹿

崔杼欲得衛之五鹿故留衛侯妻子

于齊以  
質之

六月壬子鄭公孫舍之師師入陳

傳左初陳侯會楚子伐鄭

在前年

當陳隧者井堙木刊

隧往

也堙塞也刊除也

鄭人怨之六月鄭子展子產帥車七百乘

伐陳宵突陳城

突穿也

遂入之陳侯扶其太子偃師奔

墓

欲逃冢間

遇司馬桓子

陳之司馬

曰載余曰將巡城

不欲載公以巡

城辭遇賈獲

賈獲陳大夫

載其母妻下之而授公車公曰舍

而母辭曰不祥

雖急猶不欲男女無別

與其妻扶其母以奔墓

亦免子展命師無入公官與子產親御諸門

欲服之而已故

禁侵掠

陳侯使司馬桓子賂以宗器陳侯免擁社

免喪服擁

社抱社  
主示服

使其衆男女別而纍以待于朝

纍自囚繫以待命

子

展執紼而見

紼馬纜

再拜稽首承飲而進獻

示不失臣敬

子

美入數俘而出

子美子產也但數其所獲人數不將以歸

祝祓社司徒致

民司馬致節司空致地乃還

祓除也節兵符陳亂故正其衆官修其所職以

安定之

去秋夷儀之會楚合陳蔡許伐鄭是年復會夷儀

鄭慮楚復來先帥師入陳以奪其心鄭以蕞爾國

當南北之衝晉楚之師更至疊出自子產得政不

獨修辭執禮足以服彊大而軍政之修守不可拔  
攻則必克以是知立國貴自彊也

秋八月己巳諸侯同盟于重丘

重丘杜注齊地褰宇記  
聊城縣東北有重丘聊

城今山東  
東昌府治

左傳秋七月己巳

己巳七月十二  
日經書八月誤

同盟于重丘齊成故

也

夷儀之會不書伐以齊逆服兵不加也杜氏預謂  
伐齊而書同盟以明齊亦同盟非也使齊果同盟

當時書諸侯及齊某盟以著其失賊列姦之罪矣  
據經會不書伐而同盟書諸侯乃中有間事之恒  
辭蓋晉既許齊成齊亂未定崔杼既不敢自行又  
懼他人見諸侯而生異議實未嘗使人出受盟耳

附錄  
左傳

趙文子為政

趙武代  
范匄

令薄諸侯之幣而重其禮

穆叔見之謂穆叔曰自今以往兵其少弭矣

弭止也

齊

崔慶新得政將求善于諸侯武也知楚令尹

令尹屈建

若

敬行其禮道之以文辭以靖諸侯兵可以弭

為二十七年晉



楚盟于  
宋傳

公至自會

衛侯入于夷儀

左傳衛獻公入于夷儀

公羊傳陳儀者何衛之邑也曷為不言入于衛諼君以

弑也

諼詐也時衛侯為剽所逐不能自復詐言願居是邑為剽臣然後伺侯間隙使甯喜弑之

衛侯之入夷儀與鄭伯突同而或名或不名者鄭伯奪正以立國人君之諸侯助之不知其義不可

以有國也故特書其名以絕之若衍之出奔雖不為無罪而非突比故止書其爵此輕重之權衡也

楚屈建帥師滅舒鳩

左傳楚遠子馮卒屈建為令尹

屈建子木

屈蕩為莫敖

代屈建

舒鳩人卒叛

前年辭不叛

楚令尹子木伐之及離城

杜注舒鳩

城

吳人救之子木遽以右師先

先至舒鳩

子彊息桓子捷

子駢子孟帥左師以退

五人不與吳相遇而退

吳人居其閒

七日

居楚兩軍之閒

子彊曰久將墊隘隘乃禽也

墊隘慮水雨

不

如速戰請以其私卒誘之簡師陳以待我

簡閫精兵駐後為陳

我克則進奔則亦視之乃可以免不然必為吳禽從之五人以其私卒先擊吳師吳師奔登山以望見楚師不繼復逐之傳諸其軍

吳還逐五子至其本軍

簡師會之吳師大敗遂圍舒鳩舒鳩潰八月楚滅舒鳩

晉霸既衰楚勢益彊諸侯畏之故滅國書大夫之名氏自是凡大夫帥師滅國皆以名見而不復書人矣滅國不書大夫者吳也其威猶未盛於中夏

也

冬鄭公孫夏帥師伐陳

夏公羊作薑

左傳鄭子產獻捷于晉

獻入陳之功

戎服將事晉人問陳之

罪對曰昔虞闕父為周陶正以服事我先王

闕父舜之後當

周之興闕父為武王陶正

我先王賴其利器用也與其神明之後

也

舜聖故謂之神明

庸以元女大姬配胡公

庸用也元女武王之長女胡公

闕父之子滿也

而封諸陳以備三恪

周封夏殷後又封舜後謂之三恪示敬也

則

我周之自出至于今是賴桓公之亂蔡人欲立其出

陳桓公鮑卒陳亂事在魯  
桓五年蔡出桓公子厲公  
我先君莊公奉五父而立

之五父佗桓公弟殺大子免而代之鄭莊公因定其位  
蔡人殺之我又與蔡人

奉戴厲公至于莊宣皆我之自立  
陳莊公宣公時厲公子夏氏

之亂成公播蕩又我之自入君所知也  
宣公十一年陳夏徵舒弑

靈公靈公之子成公奔晉自晉因鄭而入  
今陳忘周之大德蔑我大惠棄

我姻親介恃楚衆以馮陵我敝邑不可億逞  
億度也逞盡也

我是以有往年之告  
謂鄭伯稽首告晉請伐陳  
未獲成命則有我

東門之役  
前年陳從楚伐鄭東門  
當陳隧者井堙木刊敝邑大

懼不競而恥大姬天誘其衷啓敝邑心陳知其罪授  
手于我用敢獻功晉人曰何故侵小對曰先王之命  
唯罪所在各致其辟且昔天子之地一圻

方千里

列國

一同

方百里

自是以衰

衰差降

今大國多數圻矣若無侵

小何以至焉晉人曰何故戎服對曰我先君武莊為

平桓卿士

鄭武公莊公為周平王桓王卿士

城濮之役文公布命曰

晉文公

各復舊職命我文公戎服輔王以受楚捷不敢

廢王命故也士莊伯不能詰

士莊伯士弱也

復于趙文子文

子曰其辭順犯順不祥乃受之冬十月子展相鄭伯

如晉拜陳之功

謝晉受其功

子西復伐陳陳及鄭平仲尼

曰志有之

志古書

言以足志文以足言

足猶成也

不言誰知

其志言之無文行而不遠晉為伯鄭入陳非文辭不

為功慎辭哉

鄭再伐陳取成而還陳不能報楚不敢問以子產

方明其政刑衆知鄭之不可侮也

附錄左傳

楚為掩為司馬

為子馮之子

子木使庀賦

庀治

數甲兵

數

甲午為掩書土田

書土地之所宜

度山林

量度山林之材以供國用

鳩

藪澤

鳩聚也聚成藪澤使民不得焚燎以備田獵之處

辨京陵

辨別也絕高曰京大阜曰

陵別之以為冢墓之地

表淳鹵

淳鹵地薄之地表異輕其賦稅

數疆潦

疆界有流潦者

計數減其租入規偃豬

偃豬下濕之地規度其受水多少

町原防

廣平曰原防隄也隄

防閒地不得方正如井田別為小頃町

牧隰皋

隰皋水崖下濕為芻牧之地

井衍沃

衍沃平美之地則制以為井田

量入修賦

量九土之所入而治理其賦稅

賦車籍馬

籍疏其毛色歲齒以備軍用

賦車兵徒卒甲楯之數

車兵甲士數器仗有常數

既成以授子木禮也

得治國之禮傳言楚之所以興



十有二月吳子遏伐楚門于巢卒

遏公羊穀梁作謁

左傳

十二月吳子諸樊伐楚以報舟師之役

舟師在二十四年

門于巢

攻巢門

巢牛臣曰

牛臣巢人

吳王勇而輕若啓之

啓開

門也

將親門我獲射之必殪是君也死疆其少安從之

吳子門焉牛臣隱于短牆以射之卒

公羊傳

門于巢卒者何入門乎巢而卒也入門乎巢而

卒者何入巢之門而卒也吳子謁何以名傷而反未

至乎舍而卒也

穀梁傳

以伐楚之事門于巢卒也

因伐楚而經巢

于巢者外乎

楚也

言于巢則不在楚

門于巢乃伐楚也

先攻巢乃可伐楚

諸侯不

生名取卒之名加之伐楚之上者見以伐楚卒也其

見以伐楚卒何也古者大國過小邑小邑必飾城而

請罪禮也

飾城者修守備請罪問所以致師之意

吳子謁伐楚至巢入

其門門人射吳子有矢創反舍而卒古者雖有文事

必有武備非巢之不飾城而請罪非吳子之自輕也

非責兩

譏之也

舉卒之名加於伐楚之上與七年鄭伯髡頑如會  
卒于鄆同義皆以便文耳門于巢謂攻其城而門  
焉見遏之死於兵也若暴疾過巢門而卒則當書  
卒于巢

附錄  
左傳

楚子以滅舒鳩賞子木辭曰先大夫為子之功

也以與焉掩

往年楚子將伐舒鳩為子  
馮請退師以湏其叛故

晉程鄭卒

子產始知然明

前年然明謂程鄭將  
死今如其言故知之

問為政焉對曰

視民如子見不仁者誅之如鷹鷂之逐鳥雀也子產

喜以語子大叔且曰他日吾見蔑之面而已

蔑然今明名

吾見其心矣子大叔問政于子產子產曰政如農功日夜思之思其始而成其終朝夕而行之行無越思

如農之有畔其過鮮矣 衛獻公自夷儀使與甯喜

言

求復國也

甯喜許之大叔文子聞之

大叔儀

曰烏乎詩所

謂我躬不說皇恤我後者甯子可謂不恤其後矣

詩小

雅謂甯子必身受禍不得恤其後也

將可乎哉殆必不可君子之行思

其終也思其復也書曰慎始而敬終終以不困

周書蔡仲

之命詩曰夙夜匪解以事一人今甯子視君不如奕棋

其何以免乎奕者舉棋不定不勝其耦耦對敵也而況置

君而弗定乎必不免矣九世之御族一舉而滅之可

哀也哉

甯氏出自衛武公及喜九世也明年衛獻公歸國二十七年果殺甯喜

會于

夷儀之歲齊人城邾

在二十四年不直言會夷儀者別二十五年夷儀會

其五

月秦晉為成

自十四年十三國伐秦至是始平

晉韓起如秦涖盟秦

伯車如晉涖盟

伯車秦伯之弟鍼也

成而不結

傳為後年修成起本

日講春秋解義卷四十三

欽定四庫全書

日講春秋解義卷四十四

襄公

二十有六年春

附錄左傳

二十六年春秦伯之弟鍼如晉修成

修會夷儀歲之成

叔向命名行人子員

欲使答秦命

行人子朱曰朱也當御

御進也言次當行

三云叔向不應子朱怒曰班爵同何以黜

朱于朝撫劍從之叔向曰秦晉不和久矣今日之事

幸而集晉國賴之不集三軍暴骨子員道二國之言  
無私子常易之姦以事君者吾所能御也拂衣從之  
人救之平公曰晉其庶乎吾臣之所爭者大師曠曰  
公室懼卑臣不心競而力爭

謂二子不心競為忠而撫劍拂衣

不務

德而爭善

爭謂所行為善

私欲已侈能無卑乎

王二月辛卯衛甯喜弑其君剽

左衛獻公使子鮮為復

使為已求反國

辭敬如強命之

敬如獻公

及子鮮之母

對曰君無信臣懼不免敬如曰雖然以吾故

也許諾初獻公使與甯喜言

言復國

甯喜曰必子鮮在

不然必敗

子鮮賢國人信之必欲使在其間

故公使子鮮子鮮不獲

命于敬姒以公命與甯喜言曰苟反政由甯氏祭則

寡人甯喜告遽伯玉伯玉曰瑗不得聞君之出敢聞

其入

十四年孫氏欲逐獻公瑗走從近闕出

遂行從近闕出告右宰穀

衛大夫

右宰穀曰不可獲罪于兩君

前出獻公今弑剽

天下誰

畜之

畜猶容也

悼子曰吾受命于先人不可以貳

悼子甯喜受命

在二

十年穀曰我請使焉而觀之

觀其可還與否

遂見公于夷儀



反曰君淹恤在外十二年矣而無憂色亦無寬言猶

夫人也若不已死無日矣悼子曰子鮮在右宰穀曰

子鮮在何益多而能亡

言子鮮為義多不過亡出

于我何為悼子

曰雖然弗可以已孫文子在戚孫嘉聘于齊孫襄居

守

二子孫文子之子

二月庚寅甯喜右宰穀伐孫氏不克伯

國傷

伯國孫襄父兄皆不在故乘弱攻之

甯子出舍于郊

欲奔

伯國死孫

氏夜哭國人召甯子甯子復攻孫氏克之辛卯殺子

叔及大子角

子叔衛侯剽言子叔剽無諡故

書曰甯喜弑其君剽言

罪之在甯氏也

穀梁傳

此不正其日何也殖也立之喜也君之正也

父立

以為君則子宜君之以明正也

剽雖篡立然春秋之法其實篡也以篡書其實為君也以君書剽既篡立凡衛之臣子立於其朝者君臣之分已定有致難於剽者自宜以弑君書矣先儒多謂甯喜父子反覆於二君之間故蔽其罪猶一曲之義也

衛孫林父入于戚以叛

書叛始此

左傳

孫林父以戚如晉

以邑屬晉

書曰入于戚以叛罪孫氏

也臣之祿君實有之義則進否則奉身而退專祿以周旋戮也

宋魚石入于彭城晉欒盈入于曲沃將為亂於國而抗其君不得以叛書叛者據邑而君不能討也故書叛自林父始春秋之義常以上下比事而見其始也書衛侯行出奔齊繼書會于戚而林父在

焉則知逐君者林父其終也書甯喜弑其君剽孫  
林父入于戚以叛繼書衍歸則知甯喜之弑由衍  
而林父為懼罪矣

甲午衛侯衍復歸于衛

左傳

甲午衛侯入書曰復歸國納之也大夫逆于竟者

執其手而與之言道逆者自車揖之逆于門者領之

而已

領搖其頭言衍驕心易生

公至使讓大叔文子曰寡人淹恤

在外二三子皆使寡人朝夕聞衛國之言吾子獨不

在寡人

在存問也公聞文子答甯喜之言故愆之

古人有言曰非所怨勿

怨寡人怨矣對曰臣知罪矣臣不佞不能負羈縻以

從扞牧圉臣之罪一也有出者有居者

出謂衎居臣謂剽也

不能貳通外內之言以事君臣之罪二也有二罪敢

忘其死乃行從近闕出公使止之

傳言衛侯不能安和大臣

公羊傳

此諼君以弑也其言復歸何惡剽也曷為惡剽

剽之立于是未有說也

剽以公孫簋立位非其次故未有說

然則曷為

不言剽之立不言剽之立者以惡衛侯也

衛侯失衆出奔故亦

惡之

穀梁傳

日歸見知弑也

喜弑君衍歸故錄日以見其知情

衛侯出奔齊及入于夷儀皆以爵稱今既得國乃書其名何也使人之臣弑其君而求利焉其惡大矣故特書名以著其罪而又書復歸以見國其所固有也

附錄

左傳衛人侵戚東鄙

以林父叛故

孫氏愬于晉晉戍茅氏

茅氏杜注戚東鄙

殖綽伐茅氏殺晉戍三百人

殖綽齊人今來在衛孫

蒯追之弗敢擊文子曰厲之不如

厲惡鬼比殖綽

遂從衛

師敗之圍

圍杜注衛地今直隸開州東有圍城

雍鉏獲殖綽

雍鉏孫氏臣

復

愬于晉

為下晉討衛張本

鄭伯賞入陳之功

入陳在前年

三月

甲寅朔享子展賜之先路三命之服先八邑

以路及命服為

邑先八邑三十二井

賜子產次路再命之服先六邑子產辭邑

曰自上以下隆殺以兩禮也臣之位在四

上卿子展次卿子西

十一年良霄見經十九年乃立子產為卿故位在四

且子展之功也臣不敢及

賞禮請辭邑公固予之乃受三邑

位次當受二邑以公固與之故受三

邑 公孫揮曰子產其將知政矣讓不失禮

夏晉侯使荀吳來聘

左傳 晉人為孫氏故召諸侯將以討衛也夏中行穆子

來聘

穆子荀吳

召公也

召公為澶淵會

附錄左傳

楚子秦人侵吳及雩婁

雩婁杜注屬安豐郡今江南霍丘縣西南有故

城

聞吳有備而還遂侵鄭五月至于城麋鄭皇頡戍

之

皇頡鄭大夫守城麋之邑

出與楚師戰敗穿封戌囚皇頡公子

圍與之爭之

公子圍共王子靈王也

正于伯州犂伯州犂曰請



問于囚乃立囚

立皇頡于庭而問之

伯州犂曰所爭君子也其

何不知

言王子圍及穿封戌皆非細人易別識也

上其手曰夫子為王子

圍寡君之貴介弟也下其手曰此子為穿封戌方城

外之縣尹也誰獲子

上下手以道囚意

囚曰頡遇王子弱焉

弱敗也

戌怒抽戈逐王子圍弗及楚人以皇頡歸印董

父與皇頡戍城麋

印董父鄭大夫

楚人囚之以獻于秦鄭人

取貨于印氏以請之子大叔為令正

主作辭令之正

以為請

子產曰不獲受楚之功而取貨于鄭不可謂國秦其

不然

受楚獻功大名也以貨免之小利也故謂秦不爾

若曰拜君之勤鄭國

微君之惠楚師其猶在敝邑之城下其可

辭如此歸功于秦則

董父弗從遂行秦人不予更幣從子產而後獲之

傳稱

子產之

善于辭

公會晉人鄭良霄宋人曹人于澶淵

左傳六月公會晉趙武宋向戌鄭良霄曹人于澶淵以

討衛疆戚田取衛西鄙懿氏六十以與孫氏

懿氏杜注戚城

西北五十里有懿城今戚城在開州北

趙武不書尊公也向戌不書後

也鄭先宋不失所也

如則至

于是衛侯會之

晉將執之不得與會

故不書

晉人執甯喜北宮遺使女齊以先歸

討其弑君伐孫氏也

遺北宮适之子女齊司馬侯歸晉而後告諸侯故經書在秋

衛侯如晉晉人執而

囚之于士弱氏

士弱晉主獄大夫

秋七月齊侯鄭伯為衛侯

故如晉晉侯燕享之晉侯賦嘉樂

嘉樂詩大雅取其嘉樂君子顯顯令

德宜民宜人受祿于天

國景子相齊侯

景子國弱

賦蓼蕭

蓼蕭詩小雅言大平

澤及遠若露之在蕭以喻晉君恩澤及諸侯

子展相鄭伯賦緇衣

緇衣詩鄭風取

適子之館兮還子授子之粲兮言不敢違遠于晉

叔向命晉侯拜二君曰寡

君敢拜齊君之安我先君之宗祧也敢拜鄭君之不

貳也

蓼蕭緇衣二詩所趣各不同故拜二君詞異

國子使晏平仲私于叔

向曰晉君宣其明德于諸侯恤其患而補其闕正其

違而治其煩所以為盟主也今為臣執君若之何叔

向告趙文子文子以告晉侯晉侯言衛侯之罪使叔

向告二君

言自以殺晉成三百人為罪不以林父故

國子賦轡之柔矣

逸詩

義取寬政以安諸侯若柔轡之御剛馬

子展賦將仲子兮

將仲子詩鄭風義取衆言

可畏衛侯雖別有罪而衆人謂晉為臣執君

晉侯乃許歸衛侯叔向曰鄭

七穆罕氏其後亡者也子展儉而壹

子展鄭子罕之子鄭穆公十一

子子展子西子產伯有子大叔子石伯石為七穆子然二子孔已亡子羽不為卿故惟言七穆

澶淵衛地之近戚者晉黨於孫氏討衛而疆戚田

因為此會此晉之所以失諸侯也夷儀之會以賂

定亂賊此會復披衛地以獎叛臣蓋晉之疆家皆

有弱其君之心故與隣國之亂臣聲勢相倚平公

暗弱聽其倒行逆施而不察豈不悖乎晉宋稱人

會者非卿也凡此類宜以經為斷而不可以傳汨

之疆戚田事本細微故諸國皆大夫而魯君獨親之吳人所譏國君道長而大夫不出門蓋謂此耳

秋宋公殺其世子痤

痤穀梁作座

左傳初宋芮司徒生女子

芮司徒宋大夫

赤而毛棄諸堤下共

姬之妾取以入

共姬宋伯姬

名之曰棄長而美平公入夕

平公共姬子

共姬與之食公見棄也而視之尤

尤甚也

姬納

諸御嬖生佐

佐元公

惡而婉

貌惡而心順

大子痤美而很

貌美

而心很戾

合左師畏而惡之

合左師向戌

寺人惠牆伊戾為大

子內師而無寵

惠牆氏  
伊戾名

秋楚客聘于晉過宋太子知

之請野享之公使往伊戾請從之公曰夫不惡女乎

夫謂  
太子

對曰小人之事君子也惡之不敢遠好之不敢

近敬以待命敢有貳心乎縱有共其外莫共其內臣

請往也遣之至則飲用牲加書徵之

詐作盟處為  
太子反徵驗而

騁告公曰太子將為亂既與楚客盟矣公曰為我子

又何求對曰欲速公使視之則信有焉

有盟  
徵

問諸夫

人與左師

夫人佐  
母棄也

則皆曰固聞之公囚太子太子曰

唯佐也能免我

以其婉也

召而使請曰日中不來吾知死

矣左師聞之聒而與之語

聒謹也欲使佐失期

過期乃縊而死

佐為大子公徐聞其無罪也乃亨伊戾左師見夫人

之步馬者

步馬習馬

問之對曰君夫人氏也左師曰誰為

君夫人余胡弗知國人歸以告夫人夫人使饋之錦

與馬先之以玉曰君之妾棄使某獻左師改命曰君

夫人而後再拜稽首受之

左師今使者改命也傳言宋公聞左師諛大子所以

無罪而死



申生之死晉獻終不寤宋公既知伊戾之讒而烹之乃於芮棄之寵愛左師之委任終無改焉大學於修身齊家專以辟為戒職此故耳

晉人執衛甯喜

公羊傳

此執有罪何以不得為伯討不以其罪執之也

甯喜身負大惡晉若正其罪而執之歸於京師則為霸討當如厲公之執曹伯以爵稱今以伐戚殺戍而執之以快林父之心悖矣殖與喜之惡一也

殖以附晉免喜以背晉執林父與喜之惡一也林父以附晉獲庇喜以背晉見執然則晉非執弑君之賊執不附已者耳故稱人以著其罪焉

附錄

左傳鄭伯歸自晉使子西如晉聘辭曰寡君來煩執

事懼不免于戾使夏謝不敏

夏子西名

君子曰善事大國

初楚伍參與蔡大師子朝友其子伍舉與聲子相

善也

聲子子朝之子伍舉子胥祖父椒舉也

伍舉娶于王子年王子年

為申公而亡

獲罪出奔

楚人曰伍舉實送之伍舉奔鄭將

遂奔晉聲子將如晉遇之于鄭郊班荆相與食而言

復故

班布也布荆坐地共議歸楚事

聲子曰子行也吾必復子及宋

向戌將平晉楚

平在明年

聲子通使于晉還如楚令尹子

木與之語問晉故焉且曰晉大夫與楚孰賢對曰晉

卿不如楚其大夫則賢皆卿材也如杞梓皮革自楚

往也雖楚有材晉實用之子木曰夫獨無族姻乎對

曰雖有而用楚材實多歸生聞之

歸生聲子名

善為國者

賞不僭而刑不濫賞僭則懼及淫人刑濫則懼及善

人若不幸而過寧僭無濫與其失善寧其利淫無善

人則國從之

從之亡也

詩曰人之云亡邦國殄瘁無善人

之謂也

詩大雅殄盡也瘁病也

故夏書曰與其殺不辜寧失不

經懼失善也

夏書大禹謨不經不用常法

商頌有之曰不僭不濫

不敢怠皇命于下國封建厥福

詩商頌言殷湯賞不僭差刑不濫濫不敢

怠解以自寬暇故能為下國所命為天子

此湯所以獲天福也古之治民

者勸賞而畏刑恤民不倦賞以春夏刑以秋冬

順天時

是以將賞為之加膳加膳則飫賜

飫饜也酒食賜下無不饜足所謂加

也勝此以知其勸賞也將刑為之不舉不舉則徹樂此

以知其畏刑也夙興夜寐朝夕臨政此以知其恤民

也三者禮之大節也有禮無敗今楚多淫刑其大夫

逃死于四方而為之謀主以害楚國不可救療所謂

不能也

不能用其材

子儀之亂

在文十四年

析公奔晉晉人真

諸戎車之殿

殿後車

以為謀主繞角之役晉將遁矣析

公曰楚師輕窵易震蕩也若多鼓鈞聲以夜軍之楚

師必遁晉人從之楚師宵潰晉遂侵蔡襲沈獲其君

敗申息之師于桑隧獲申麗而還

成六年晉欒書救鄭與楚師遇于繞

角楚師還晉侵沈獲沈子八年復侵楚敗申息獲申麗

鄭于是不敢南面楚失

華夏則析公之為也雍子之父兄譖雍子君與夫人

不善是也

不是其曲直

雍子奔晉晉人與之郤

郤杜注晉邑

以

為謀主彭城之役晉楚遇于靡角之谷

在成十八年

晉將

遁矣雍子發命于軍曰歸老幼反孤疾二人役歸一

人簡兵蒐乘秣馬蓐食師陳焚次

次舍也焚舍示必死

明日將

戰行歸者而逸楚囚

欲使楚知之

楚師宵潰晉降彭城而

歸諸宋以魚石歸

在元年

楚失東夷子辛死之則雍子

之為也

楚東小國及陳見楚不能救彭城皆叛五年楚人討陳叛故殺令尹子辛

子反與

子靈爭夏姬

子靈巫臣

而雍害其事子靈奔晉晉人與之

邢

邢杜注晉邑

以為謀主扞禦北狄通吳于晉教吳叛楚

教之乘車射御驅侵使其子狐庸為吳行人焉吳于

是伐巢取駕克棘入州來

駕棘杜注皆楚邑譙國鄆縣東北有棘亭在今河南

永城縣南

楚罷于奔命至今為患則子靈之為也

事見成七年

若敖之亂伯賁之子賁皇奔晉晉人與之苗

若敖亂在宣四

年苗杜注晉邑今河南濟源縣西有苗亭以為謀主鄢陵之役在成十六年楚

晨壓晉軍而陳晉將遁矣苗賁皇曰楚師之良在其

中軍王族而已若塞井夷竈成陳以當之樂范易行

以誘之

樂書時將中軍范變佐之易行謂簡易兵備令楚貪已不復顧二穆之兵

中行二

卻必克二穆

卻錡時將上軍中行偃佐之卻至佐新軍令此三人分良以攻二穆之兵楚子

重子辛皆出穆王故曰二穆

吾乃四萃于其王族必大敗之

四萃四面

集攻之

晉人從之楚師大敗王夷師燬

夷傷也燬火滅也軍敗之狀

子反死之鄭叛吳興楚失諸侯則苗賁皇之為也子



木曰是皆然矣聲子曰今又有甚于此椒舉娶于申公子牟子牟得戾而亡君大夫謂椒舉女實遣之懼而奔鄭引領南望曰庶幾赦余亦弗圖也今在晉矣晉人將與之縣以比叔向彼若謀害楚國豈不為患子木懼言諸王益其祿爵而復之聲子使椒鳴逆之

椒鳴伍  
舉子

八月壬午許男甯卒于楚

冬楚子蔡侯陳侯伐鄭

左傳許靈公如楚請伐鄭

十六年晉伐許他國皆大夫獨鄭伯自行故許恚欲報之

曰師不興孤不歸矣八月卒于楚楚子曰不伐鄭何以求諸侯冬十月楚子伐鄭鄭人將禦之子產曰晉

楚將平諸侯將和

和在明年

楚王是故昧于一來不如使

逞而歸乃易成也夫小人之性讒于勇嗇于禍以足

其性而求名焉者非國家之利也若何從之

讒動也嗇貪也

言鄭之欲與楚戰者皆讒勇貪名之人非能為國計慮久利不可從

子展說不禦寇十

二月乙酉入南里

南里杜注鄭邑今河南新鄭縣南有地名南里

墮其城涉

于樂氏

樂氏杜注津名在今河南新鄭縣境洧水濟渡處

門于師之梁

鄭城門

縣門發獲九人馬涉于汜而歸

于汜城下涉汝水南歸

而後葬

許靈公

卒靈公之志而後葬之

楚以許故偕蔡陳伐鄭鄭自蕭魚以來至此三被  
楚禍而猶未忍叛晉則悼公推誠之效也然十八  
年楚公子午不得志於鄭二十四年諸侯救之此  
年諸侯不救鄭亦不禦使楚得逞蓋是時晉平公  
庸大夫專恣不在諸侯而南北分霸之勢成矣

葬許靈公

附錄左傳

衛人歸衛姬于晉乃釋衛侯

衛侯以女說晉而後得免

君子

是以知平公之失政也

晉韓宣子聘于周王使請

事

問何事來聘

對曰晉士起將歸時事于宰旅無他事矣

起宣子名禮諸侯大夫入天子國稱士時事四時貢職宰旅冢宰之下士言獻貢賦于宰旅不敢斥尊

王聞之曰韓氏其昌阜于晉乎辭不失舊齊人城

邾之歲

在二十四年

其夏齊烏餘以廩丘奔晉

烏餘齊大夫廩丘杜

注東郡廩丘縣故城是

在今山東范縣東南襲衛羊角取之

羊角杜注廩丘縣所治羊

角城是在今山東  
范縣東南新安村

遂襲我高魚

高魚杜注高魚城在  
廩丘縣東北今山東

鄆城縣西高  
魚鄉是其地

有大雨自其竇入

雨故水  
竇開

介于其庫入  
高

魚庫而  
介其甲

以登其城克而取之又取邑于宋于是范宣

子卒

宣子  
范句

諸侯弗能治也及趙文子為政乃卒治之

文子言于晉侯曰晉為盟主諸侯或相侵也則討而

使歸其地今烏餘之邑皆討類也

言于此類  
宜見討

而貪之

是無以為盟主也請歸之公曰諾孰可使也對曰胥

梁帶能無用師

胥梁帶晉大夫能  
無用師言有權謀

晉侯使往

二十有七年春

附錄左傳

二十七年春胥梁帶使諸喪邑者具車徒以受

地必周

諸喪邑謂齊魯宋也周密也必密來勿以受地為名

使烏餘具車徒以

受封

烏餘以地來故詐許封之

烏餘以其衆出使諸侯偽效烏餘

之封者

效致也使齊魯宋偽若致邑封烏餘者

而遂執之盡獲之皆取

其邑而歸諸侯諸侯是以睦于晉

傳言趙文子賢故平公雖失政而諸

睦侯猶

齊侯使慶封來聘

左齊慶封來聘其車美孟孫謂叔孫曰慶季之車季慶

封不亦美乎叔孫曰豹聞之服美不稱必以惡終美

車何為叔孫與慶封食不敬為賦相鼠亦不知也相鼠

詩鄘風曰相鼠有皮人而無儀人而無儀不死何為慶封不知此詩為已言其闇甚為明年慶封來奔傳

齊魯不交好者三十年於茲景公即位始修好於

四鄰而命慶封來聘亦賢於日尋侵伐者矣

夏叔孫豹會晉趙武楚屈建蔡公孫歸生衛石惡陳孔

奐鄭良霄許人曹人于宋

奐公羊作瑗後同  
晉楚始同主盟

左傳宋向戌善于趙文子又善于令尹子木欲弭諸侯

之兵以為名

欲獲息民之名

如晉告趙孟趙孟謀于諸大夫

韓宣子曰兵民之殘也財用之蠹

蠹害物之蟲

小國之大

菑也將或弭之雖曰不可必將許之弗許楚將許之

以名諸侯則我失為盟主矣晉人許之如楚楚亦許

之如齊齊人難之陳文子曰晉楚許之我焉得已且

人曰弭兵而我弗許則固攜吾民矣將焉用之齊人

許之告于秦秦亦許之皆告于小國為會于宋五月



甲辰晉趙武至于宋丙午鄭良霄至六月丁未朔宋

人享趙文子叔向為介司馬置折俎禮也

折俎體解節折升之

于組合卿享宴之禮故曰禮也周禮司馬掌會同之事

仲尼使舉是禮也以為

多文辭

舉謂記錄之也宋向戌自美弭兵之意敬逆趙武趙武叔向因享宴之會展賓主之辭故

仲尼以為多文辭

戊申叔孫豹齊慶封陳湏無衛石惡至

湏無

陳文子

甲寅晉荀盈從趙武至

從後也後武遣盈如楚

丙辰邾悼

公至

小國故君自來

壬戌楚公子黑肱先至成言于晉

時令尹子

未止陳遣黑肱就晉大夫成盟載之言兩相然可

丁卯宋向戌如陳從子木

成言于楚戊辰滕成公至子木謂向戌請晉楚之從

交相見也

使諸侯從晉楚者更相朝見

庚午向戌復于趙孟趙孟

曰晉楚齊秦匹也晉之不能于齊猶楚之不能于秦

也

不能服而使之

楚君若能使秦君辱于敝邑寡君敢不固

請于齊壬申左師復言于子木子木使馭謁諸王王

曰釋齊秦他國請相見也

經所以不書齊秦

秋七月戊寅左

師至

從陳還

是夜也趙孟及子皙盟以齊言

子皙公子黑肱素要

齊其辭至盟時不得復訟爭

庚辰子木至自陳陳孔奐蔡公孫歸

生至曹許之大夫皆至以藩為軍

示不相忌

晉楚各處其

偏

晉處北楚處南

伯風謂趙孟曰

伯風荀盈

楚氛甚惡懼難

氛氣也言

楚有饗

趙孟曰吾左還入于宋若我何

營在宋北東頭為上故晉

營在東有急可左迴入宋東門

晉楚爭衡諸侯各有所屬前此時叛而即楚者不

過陳蔡鄭許近楚之國耳今則南北分霸魯宋衛

曹皆以事晉者事楚往朝會伐而天下之大防盡

潰矣自晉士穀盟垂隴以前雖霸國之大夫不以

名見也繼而內大夫與霸國之大夫離會以名見繼而齊宋衛之大夫衆會以名見繼而鄭大夫亦以名見至此而諸侯之大夫盡以名見其稱人者獨微國耳蓋大夫益張禮樂征伐皆自之出而列國之大防盡潰矣此魯侯降為家人六卿分晉之端兆也

衛殺其大夫甯喜

左傳

衛甯喜專公患之公孫免餘請殺之

免餘衛大夫

公曰

微甯子不及此吾與之言矣

言政由甯氏

事未可知祇成

惡名止也對曰臣殺之君勿與知乃與公孫無地公

孫臣謀

二公孫  
衛大夫

使攻甯氏弗克皆死公曰臣也無罪

父子死余矣

獻公出時公孫臣  
之父為孫氏所殺

夏免餘復攻甯氏殺

甯喜及右宰穀尸諸朝

穀不書  
非卿也

石惡將會宋之盟受

命而出衣其尸枕之股而哭之欲歛以亡懼不免且

曰受命矣乃行

行會于宋為明  
年石惡奔博

穀梁

稱國以殺罪累上也甯喜弑君其以累上之辭

言之何也嘗為大夫與之涉公事矣

涉猶歷也

甯喜出君

弑君而不以弑君之罪罪之者惡獻公也

剽篡國者也國人可討而甯喜嘗事之以為君不得殺也故書弑以正其罪喜弑君者也凡人宜討而衛獻與之要言以速其弑與之共事而假手於他人以殺之則殺之不以其罪故稱國以殺而不  
去其官

衛侯之弟鮒出奔晉

鮒殺梁作專

左傳子鮮曰逐我者出

謂孫林父

納我者死

謂甯喜

賞罰無章

何以沮勸君失其信而國無刑不亦難乎且鱄實使

之

使甯喜納君

遂出奔晉公使止之不可及河又使止之

止使者而盟于河

誓不還

託于木門

木門杜注晉邑

不鄉衛國

而坐

怨之深也

木門大夫勸之仕不可曰仕而廢其事罪

也從之昭吾所以出也將誰愬乎

從之謂治其事也事治則明已出欲

仕無所自愬

吾不可以立于人之朝矣終身不仕公喪之

如稅服終身

稅即總也喪服總緣裳縷細而希非五服之常本無月數痛慙子鮮故特為此

服此服無月數而厭  
公尋薨故言終身

公與免餘邑六十辭曰唯卿備

百邑臣六十矣下有上祿亂也

此一乘之邑非四井  
之邑論語稱千室又

云十室  
明通稱

臣弗敢聞且甯子唯多邑故死臣懼死之速

及也公固與之受其半以為少師公使為卿辭曰大

叔儀不貳能贊大事君其命之乃使文子為卿

文子  
大叔

儀

公羊  
傳

衛殺其大夫甯喜則衛侯之弟鱄曷為出奔晉

為殺甯喜出奔也曷為為殺甯喜出奔衛甯殖與孫



林父逐衛侯而立公孫剽甯殖病將死謂喜曰黜公者非吾意也孫氏為之我即死女能固納公乎喜曰諾甯殖死喜立為大夫使人謂獻公曰黜公者非甯氏也孫氏為之吾欲納公何如獻公曰子苟納我吾請與子盟喜曰無所用盟請使公子鱄約之喜素獻信鱄公謂公子鱄曰甯氏將納我吾欲與之盟其言曰無所用盟請使公子鱄約之子固為我與之約矣公子鱄辭曰夫負羈紲執鈇鑕從君東西南北則是臣僕

庶孽之事也若夫約言為信則非臣僕庶孽之所敢

與也獻公怒曰黜我者非甯氏與孫氏凡在爾

欲以此語

迫令必約之

公子鱄不得已而與之約已約歸至殺甯喜

公子鱄挈其妻子而去之將濟于河挈其妻子而與

之盟曰苟有履衛地食衛粟者昧雉彼視

昧割也時割雉以為

盟曰負盟者視彼割雉

穀梁傳

專喜之徒也專之為喜之徒何也已雖急納其

兄與人之臣謀弑其君是亦弑君者也專其曰弟何

也專有是信者

言君本使專與  
喜為約許以賂

君賂不入乎喜而殺

喜是君不直乎喜也故出奔晉織約邯鄲終身不言

衛專之去合乎春秋

得見幾  
之義

衛侯食言使鱣引咎而自竄過固大矣而鱣亦不

能無過蓋始雖為兄求復與喜要言然宜思所以

實剽俾兩得而無害至於政由甯氏祭則寡人則

信不近義言之必不可復者也始謀不臧終雖隱

身於異國亦差彊於食其言而不知自愧者耳先

儒多以去賢鯁過矣

秋七月辛巳豹及諸侯之大夫盟于宋

左傳

辛巳將盟于宋西門之外楚人衷甲

甲在衣中欲因會擊晉

伯州犂曰合諸侯之師以為不信無乃不可乎夫諸侯望信于楚是以來服若不信是棄其所以服諸侯也固請釋甲子木曰晉楚無信久矣事利而已苟得志焉焉用有信大宰退

太宰伯州犂

告人曰令尹將死矣

不及三年求逞志而棄信志將逞乎志以發言言以

出信信以立志參以定之

志言信三者具而後身安存

信亡何以

及三

為明年子木死起本

趙孟患楚衷甲以告叔向叔向曰何

害也匹夫一為不信猶不可單斃其死

單盡也斃路也

若合

諸侯之卿以為不信必不捷矣食言者不病

不病者單斃于

死非子之患也夫以信召人而以僭濟之必莫之與

也安能害我且吾因宋以守病則夫能致死

為楚所病則欲

入宋城夫謂宋也

與宋致死雖倍楚可也子何懼焉又不及

是曰弭兵以召諸侯而稱兵以害我吾庸多矣非所

患也季武子使謂叔孫以公命曰視邾滕

兩事晉楚則貢賦重

故欲比小國武子恐叔孫不從其言故假公命以敦之

既而齊人請邾宋人請

滕皆不與盟叔孫曰邾滕人之私也我列國也何故

視之宋衛吾匹也乃盟故不書其族言違命也晉楚

爭先

爭先歛血

晉人曰晉固為諸侯盟主未有先晉者也

楚人曰子言晉楚匹也若晉常先是楚弱也且晉楚

狎主諸侯之盟也久矣

狎更也

豈專在晉叔向謂趙孟

曰諸侯歸晉之德只非歸其尸盟也子務德無爭先

且諸侯盟小國固必有尸盟者

小國主辨具

楚為晉細不

亦可乎乃先楚人書先晉晉有信也

蓋孔子追正之

壬午宋

公兼享晉楚之大夫趙孟為客

客一生所尊

子木與之言

弗能對使叔向侍言焉子木亦不能對也乙酉宋公

及諸侯之大夫盟于蒙門之外

前盟諸大夫不敢敵公禮也今宋公以近

在其國故謙而重盟

子木問于趙孟曰范武子之德

何如對曰夫子之家事治言于晉國無隱情其祝史

陳信于鬼神無愧辭子木歸以語王王曰尚矣哉能

歆神人宜其光輔五君以為盟主也

五君謂文襄靈成景

子木

又語王曰宜晉之伯也有叔向以佐其卿楚無以當

之不可與爭晉荀盈遂如楚泣盟

重結晉楚之好

鄭伯享

趙孟于垂隴

自宋還過鄭

子展伯有子西子產子大叔二

子石從

二子石印段公孫段

趙孟曰七子從君以寵武也請皆

賦以卒君貺武亦以觀七子之志

詩以言志

子展賦草蟲

草蟲詩召南曰未見君子憂心忡忡亦既見止亦既覯止我心則降以趙孟為君子

趙孟曰善

哉民之主也

在上不忘降故可以主民

抑武也不足以當之

辭君子



伯有賦鵲之青膏

鵲之青膏詩鄘風義取人之趙孟無良我以為兄我以為君也

曰牀第之言不踰閭况在野乎非使人之所得聞也

第簀也此詩刺淫亂故云牀第之言

子西賦黍苗之四章

黍苗詩小雅四章曰肅肅

謝功名伯營之列列征師名伯成之比趙孟于名伯

趙孟曰寡君在武何能焉

推善于其君

子產賦隰桑

隰桑詩小雅義取思見君子盡心以事之曰既見君子其樂如

何趙孟曰武請受其卒章

卒章曰心乎愛矣遐不謂矣中心藏之何日忘之趙

孟欲子產之見規誨

子大叔賦野有蔓草

野有蔓草詩鄭風取其邂逅相遇適我願

今趙孟曰吾子之惠也

大叔喜于相遇故趙武受其惠

印段賦蟋蟀

蟋蟀詩唐風曰無已大康職思其居好  
樂無荒良士瞿瞿言瞿瞿然願禮義  
趙孟曰善哉

保家之主也吾有望矣

能戒懼不荒所以保家

公孫段賦桑扈

桑扈詩小雅義取君子有禮文故能受天之祐

趙孟曰匪交匪敖福將焉往

此桑扈詩卒章趙孟因以取意

若保是言也欲辭福祿得乎卒享文

子告叔向曰伯有將為戮矣詩以言志志誣其上而

公怨之以為賓榮

伯有稱人之無良是誣其上也趙孟倡賦詩以自寵故曰為賓榮

其能久乎幸而後亡叔向曰然已侈所謂不及五稔

者夫子之謂矣

為三十年鄭叔良霄傳

文子曰其餘皆數世之

主也子展其後亡者也在上不忘降

謂賦草蟲曰我心則降

印

氏其次也樂而不荒

謂賦蟋蟀曰好樂無荒

樂以安民不淫以

使之後亡不亦可乎

宋左師請賞曰請免死之邑

欲宋君稱功加厚賞故謙言免死之邑

公與之邑六十以示子罕子罕

曰凡諸侯小國晉楚所以兵威之畏而後上下慈和

慈和而後能安靖其國家以事大國所以存也無威

則驕驕則亂生亂生必滅所以亡也天生五材

金木水火

土民並用之廢一不可誰能去兵兵之設久矣所以

威不軌而昭文德也聖人以興

謂湯武

亂人以廢

謂桀紂

廢興存亡昏明之術皆兵之由也而子求去之不亦

誣乎以誣道蔽諸侯罪莫大焉縱無大討而又求賞

無厭之甚也削而投之

削賞左師之書

左師辭邑向氏欲攻

司城

司城子罕

左師曰我將亡夫子存我德莫大焉又可

攻乎君子曰彼已之子邦之司直

詩鄭風司主也

樂喜之謂

乎

樂喜子罕也善其不阿向戌

何以恤我我其收之

詩周頌恤憂也收取也

向戌之謂乎

善向戌能知其過

公羊傳

曷為再言豹殆諸侯也

殆危也

曷為殆諸侯為衛

石惡在是也曰惡人之徒在是矣

穀梁傳

湟梁之會諸侯在而不曰諸侯之大夫大夫不

臣也晉趙武恥之豹云者恭也

不舉姓氏

諸侯不在而曰

諸侯之大夫大夫臣也其臣恭也晉趙武為之會也

楚之爭霸常始於宋而南北分霸卒成於宋自向

戌為弭兵之說而趙武從之驅天下諸侯南鄉而

朝楚楚欲不違而晉勢益大屈矣方是時晉楚皆

倦於兵是以偶息數年之爭而魯師取鄆晉師敗狄至楚圍篡立大合諸侯伐吳滅賴所謂弭兵者安在哉湔梁之盟不書諸侯之大夫以諸侯在會而大夫盟故不書諸侯以罪其臣此盟則諸侯不在故書諸侯之大夫以存其君義各有當也

附錄左傳

齊崔杼生成及彊而寡

偏喪曰寡寡特也

娶東郭姜生

明東郭姜以孤入曰棠無咎

無咎棠公子

與東郭偃相崔

氏

偃姜之弟

崔成有疾而廢之

有惡疾也

而立明成請老于崔

崔杜注濟南東朝陽縣西北有崔氏城在今山東章丘縣西北

崔子許之偃與無咎

弗子曰崔宗邑也必在宗主

宗邑宗廟所在宗主謂崔明

成與彊

怒將殺之告慶封曰夫子之身

夫子謂崔杼

亦子所知也

唯無咎與偃是從父兄莫得進矣大恐害夫子敢以

告慶封曰子姑退吾圖之告盧蒲嬖

嬖慶封屬大夫

盧蒲嬖

曰彼君之讎也

君謂齊莊公

天或者將棄彼矣彼實家亂

子何病焉崔之薄慶之厚也他日又告

成彊復告

慶封曰

苟利夫子必去之難吾助女九月庚辰崔成崔彊殺

東郭偃棠無咎于崔氏之朝崔子怒而出其衆皆逃

求人使駕不得使圉人駕寺人御而出

圉人養馬者寺人奄士

且曰崔氏有福止余猶可

恐滅家禍不止其身

遂見慶封慶封

曰崔慶一也

言如一家

是何敢然請為子討之使盧蒲嬖

帥甲以攻崔氏崔氏堞其宮而守之

堞短垣使其衆居短垣內以自

守

弗克使國人助之遂滅崔氏殺成與彊而盡俘其

家其妻縊

妻東郭姜

嬖復命于崔子且御而歸之

嬖為崔子御

至則無歸矣乃縊

終入于其宮不見其妻凶

崔明夜辟諸大墓

先開



人之家以藏之

辛巳崔明來奔慶封當國楚薳罷如晉泣

盟

罷令尹子蕩報荀盈也

晉侯享之將出賦既醉

既醉詩大雅曰既醉以酒

既飽以德君子萬年介爾景福以美晉侯比之太平君子也

叔向曰薳氏之有後

于楚國也宜哉承君命不忘敏子蕩將知政矣敏以

事君必能養民政其馬往崔氏之亂

在二十五年

申鮮

虞來奔

申鮮虞莊公之黨

僕債于野以喪莊公

為莊公服喪

冬楚

人召之遂如楚為右尹

傳言楚能用賢

冬十有二月乙亥朔日有食之

左傳十一月乙亥朔日有食之辰在申司歷過也再失

閏矣

謂斗建指申周十一月今之九月當建戌而在申故知再失閏也文十一年三月甲子至今年

七十一歲應有二十六閏今長  
歷推得二十四閏通計少再閏

傳曰辰在申再失閏矣若十有二月當為辰在亥  
則是三失閏非再失也杜氏預推歷與傳合當以  
傳為定

日講春秋解義卷四十四

欽定四庫全書

日講春秋解義卷四十五

襄公

二十有八年春無冰

左傳

二十八年春無冰梓慎曰

梓慎魯大夫

今茲宋鄭其饑

乎歲在星紀而淫于玄枵

歲歲星也星紀在丑斗牛之次玄枵在子虛危之次

十八年晉董叔曰天道多在西北是歲歲星在亥至此年十一歲故在星紀明年乃當在玄枵今已在玄

枵淫行失次

以有時菑陰不堪陽

時菑無冰也盛陰用事而溫無冰是陰不勝陽

地氣蛇乘龍

蛇玄武之宿虛危之星龍歲星歲星木也木為青龍失次出虛危下為蛇所乘

龍宋鄭之星也

歲星本位在東方東方房心為宋角亢為鄭故以龍為宋鄭之星

鄭必饑玄枵虛中也

玄枵三宿虛星在其中

枵耗名也土虛而

民耗不饑何為

歲為宋鄭之星今失常淫入虛耗之次時復無冰地氣發洩故曰土虛民

耗

自正月至三月為春在夏時則十一月十二月正

月也此三月內無冰則天道恒燠故特書之以紀

異

附錄左傳

夏齊侯陳侯蔡侯北燕伯杞伯胡子沈子白狄

朝于晉宋之盟故也

陳侯蔡侯胡子沈子楚屬也宋盟曰晉楚之從交相見故朝晉

燕國杜注薊縣今京城東偏即其地

齊侯將行慶封曰我不與盟何為

于晉

以宋盟釋齊秦

陳文子曰先事後賄禮也

事大國當先從其政事而

後薦賄以副已心

小事大未獲事焉從之如志禮也

言當從大國請

事以順其志

雖不與盟敢叛晉乎重丘之盟未可忘也

重丘

盟在二十五年

子其勸行

夏衛石惡出奔晉

左傳衛人討甯氏之黨故石惡出奔晉衛人立其從子

圃以守石氏之祀

惡之先石碭有功衛國故

禮也

邾子來朝

左傳邾悼公來朝時事也

邾自晉執其君魯取其田微弱極矣故亟修禮於

魯

秋八月大雩

左傳秋八月大雩旱也

附錄  
左傳

蔡侯歸自晉入于鄭鄭伯享之不敬子產曰蔡

侯其不免乎日其過此也

往日至  
晉時

君使子展廷勞于

東門之外而傲

廷往  
也

吾曰猶將更之今還受享而惰

乃其心也君小國事大國而惰傲以為已心將得死

乎若不免必由其子其為君也淫而不父

通大子  
班之妻僑

聞之如是者恒有子禍

為三十年  
蔡世子  
班弒其君傳

仲孫羯如晉

左傳孟孝伯如晉告將為宋之盟故如楚也

魯晉屬故  
告晉而行



公因宋之盟將朝於楚又先稟命於晉南北分霸  
列國皆疲於奔命矣

附錄  
左傳

蔡侯之如晉也鄭伯使游吉如楚及漢楚入還

之曰宋之盟君實親辱

君謂  
鄭伯

今吾子來寡君謂吾子

姑還吾將使駟奔問諸晉而以告

問鄭君應  
來朝否

子大叔

曰宋之盟君命將利小國而亦使安定其社稷鎮撫  
其民人以禮承天之休此君之憲令而小國之望也  
寡君是故使吉奉其皮幣以歲之不易聘于下執事

言歲有饑荒之難故鄭伯不得自朝楚

今執事有命曰女何與政令之

有必使而君棄而封守跋涉山川蒙犯霜露以逞君  
心小國將君是望敢不唯命是聽無乃非盟載之言  
以闕君德而執事有不利焉小國是懼不然其何勞  
之敢憚子大叔歸復命告子展曰楚子將死矣不修  
其政德而貪昧于諸侯以逞其願欲久得乎周易有  
之在復三三震下坤上復之頤三三震下艮上頤復  
曰迷復凶復上六爻辭也復反也陰處極位終迷不反故凶  
其楚子之謂乎欲復

其願

謂欲得鄭朝以復其願

而棄其本

不修德

復歸無所

失道是已遠

謂迷復能無凶乎君其往也送葬而歸以快楚心楚

不幾十年未能恤諸侯也

幾近也

吾乃休吾民矣裨竈

曰

裨竈鄭大夫裨諶

今茲周王及楚子皆將死歲棄其次而

旅于明年之次以害鳥帑周楚惡之

旅客處也歲星棄星紀之次客

在玄枵歲星所在其國有福失次于北禍衝在西南為朱鳥鳥尾曰帑鶉火鶉尾周楚之分故周王楚子

受其咎俱論歲星過次裨諶則曰宋鄭饑裨竈則曰周楚王死傳故備舉以示卜占惟人所在

九

月鄭游吉如晉告將朝于楚以從宋之盟子產相鄭

伯以如楚舍不為壇

至敵國郊除地封土為壇以受郊勞

外僕言曰

外僕

掌次舍者

昔先大夫相先君適四國未嘗不為壇自是至

今亦皆循之今子草舍無乃不可乎子產曰大適小

則為壇小適大苟舍而已焉用壇僑聞之大適小有

五美宥其罪戾赦其過失救其菑患賞其德刑

刑法也

教其不及小國不困懷服如歸是故作壇以昭其功

宣告後人無怠于德小適大有五惡說其罪戾

自解說

請其不足行其政事

奉行大國之政

共其職貢從其時命不

然則重其幣帛以賀其福而弔其凶皆小國之禍也  
焉用作壇以昭其禍所以告子孫無昭禍焉可也

冬齊慶封來奔

左傳

齊慶封好田而嗜酒與慶舍政

舍慶封子封當國不自為政以付舍

則以其內實遷于盧蒲嬖氏

內實實物妻妻也移而居嬖家

易內而

飲酒數日國遷朝焉

就于盧蒲氏朝見封

使諸亡人得賊者以

告而反之

亡人辟崔氏難出奔者

故反盧蒲癸癸臣子之

子之慶舍

有寵妻之

子之以其女妻癸

慶舍之士謂盧蒲癸曰男女辨

姓子不辟宗何也

慶氏盧蒲氏皆姜姓

曰宗不余辟余獨焉辟

之賦詩斷章余取所求焉惡識宗

言已欲求寵于慶氏為莊公報讎不

能顧禮如賦詩者取其一章而已

癸言王何而反之二人皆嬖

二子皆莊

公使執寢戈而先後之

寢戈親近兵杖

公膳日雙雞

卿大夫之膳食

饗人竊更之以鶩

鶩鴨也

御者知之則去其肉而以其

洎饋

御進食者洎肉汁也欲使諸大夫怨慶氏滅其膳蓋癸與何之謀

子雅子尾怒

二子皆惠公孫

慶封告盧蒲嬖盧蒲嬖曰譬之如禽獸吾寢

處之矣使析歸父告晏平仲

欲與共謀子雅子尾

平仲曰嬰之

衆不足用也知無能謀也言弗敢出

不洩謀

有盟可也

子家曰

子家析歸父

子之言云又焉用盟告北郭子車

子車

齊大夫

子車曰人各有以事君非佐之所能也

佐子車名陳

文子謂桓子曰

桓子文子之子無字

禍將作矣吾其何得對曰

得慶氏之木百車于莊

慶封時有此木積于六軌之道

文子曰可慎

守也已

善其不志于貨財

盧蒲癸王何卜攻慶氏示子之兆

曰或卜攻讎敢獻其兆子之曰克見血冬十月慶封

田于萊陳無宇從丙辰文子使召之請曰無宇之母

疾病請歸慶季卜之

季慶封

示之兆曰死奉龜而泣

無字

乃

使歸慶嗣聞之

嗣慶封之族

曰禍將作矣謂子家速歸

子家慶封字

禍作必于嘗

嘗秋祭

歸猶可及也子家弗聽亦無悛志子息

曰

子息慶嗣

亡矣幸而獲在吳越陳無宇濟水而戕舟發梁

不欲

慶封得救難

盧蒲姜謂癸曰

盧蒲姜慶舍女

有事而不告我必不捷

矣癸告之

告欲殺慶舍

姜曰夫子懷

夫子謂慶舍

莫之止將不出

我請止之癸曰諾十一月乙亥嘗于大公之廟慶舍泣

事盧蒲姜告之且止之弗聽曰誰敢者遂如公

至公所

麻



嬰為尸慶其為上獻

上獻先獻者二子皆慶氏黨

盧蒲癸王何執寢

戈慶氏以其甲環公宮

廟在宮內

陳氏鮑氏之國人為優

俳優

慶氏之馬善驚士皆釋甲束馬而飲酒且觀優至于魚

里

魚里杜注里名當在今山東臨淄縣境優在魚里就觀之

樂高陳鮑之徒介慶氏

之甲

樂子雅高子尾陳陳須無鮑鮑國

子尾抽桷擊扉三

桷榑也扉門闕也以桷擊

扉為期

盧蒲癸自後刺子之王何以戈擊之解其左肩猶

援廟桷動于莞

莞屋棟

以俎壺投殺人而後死

言其多力

遂殺

慶繩麻嬰

慶繩慶其

公懼鮑國曰羣臣為君故也陳須無以

公歸稅服而如內宮慶封歸遇告亂者丁亥伐西門

弗克還伐北門克之入伐內宮

陳鮑在公所故

弗克反陳于

嶽

嶽杜注里名

請戰弗許遂來奔獻車于季武子美澤可

以鑑展莊叔見之

魯大夫

曰車甚澤人必瘁宜其亡也

叔孫穆子食慶封慶封汜祭

禮食有祭示有所先也汜祭遠散所祭不共

穆子不說使工為之誦茅鴟

茅鴟逸詩刺不敬

亦不知既而

齊人來讓

讓魯受慶封

奔吳吳句餘予之朱方

句餘吳子夷末也朱

方杜注吳邑今江南鎮江府治

聚其族焉而居之富于其舊子服惠

伯謂叔孫曰天殆富淫人慶封又富矣穆子曰善人富謂之賞淫人富謂之殃天其殃之也其將聚而殲

旃

為昭四年  
殺慶封傳

據左氏盧蒲癸王何殺慶舍逐慶封而戮崔杼經不書崔杼死於家難非以賊討過時而戮其屍與鄭歸生同或其國不告或雖告而義不得以討賊書也莊公之弑倖臣從死者十人而為之討賊復讎亦出於倖臣豈非卿大夫之恥與

附錄  
左傳

癸巳天王崩未來赴亦未書禮也 崔氏之亂

喪羣公子故鉏在魯叔孫還在燕賁在句瀆之丘

在襄

二十  
五年

及慶氏亡皆召之具其器用而反其邑焉與晏

子邶殿其鄙六十

邶殿杜注  
齊百郡

弗受子尾曰富人之所

欲也何獨弗欲對曰慶氏之邑足欲故亡吾邑不足

欲也益之以邶殿乃足欲足欲亡無日矣在外不得

宰吾一邑不受邶殿非惡富也恐失富也且夫富如

布帛之有幅焉為之制度使無邇也夫民生厚而用

利于是乎正德以幅之使無黜嫚

黜猶放也

謂之幅利

過則為敗吾不敢貪多所謂幅也與北郭佐邑六十

受之與子雅邑辭多受少與子尾邑受而稍致之公

以為忠故有寵釋盧蒲嬖于北竟

釋放也

求崔杼之尸

將戮之不得叔孫穆子曰必得之武王有亂臣十人

崔杼其有乎不十人不足以葬

葬必須十人崔氏不能令十人同心故必

得既崔氏之臣曰與我其拱壁吾獻其柩于是得之

十二月乙亥朔齊人遷莊公殯于大寢

路寢

以其棺尸

崔杼于市國人猶知之皆曰崔子也

始求崔杼之尸不得故傳云國

人皆知之

十有一月公如楚

諸夏之君始旅見于楚

左傳

為宋之盟故公及宋公陳侯鄭伯許男如楚公過

鄭鄭伯不在

已在楚

伯有迂勞于黃崖不敬

黃崖杜注榮陽宛陵

縣西有黃水今黃水在河南新鄭縣東

穆叔曰伯有無戾于鄭鄭必有

大咎敬民之主也而棄之何以承守鄭人不討必受其辜濟澤之阿行潦之頻藻寔諸宗室季蘭尸之敬

也

言取蘋藻之菜于阿澤之中使服蘭敬可棄乎為

之女而為之主神猶享之以其敬也

十年鄭殺及漢楚康王卒公欲反叔仲昭伯曰

昭伯叔仲

帶

我楚國之為豈為一人行也子服惠伯曰君子有

遠慮小人從邇饑寒之不恤誰遑其後不如姑歸也

叔孫穆子曰叔仲子專之矣

言足專任

子服子始學者也

言未識遠

榮成伯曰

成伯榮駕鸞

遠圖者忠也公遂行宋向戌

曰我一人之為非為楚也饑寒之不恤誰能恤楚姑

歸而息民待其立君而為之備宋公遂反

舉魯以見其餘也書公朝于王所見王綱之墜書公如楚見霸業之衰凡舉魯以見其餘者皆天下之辭也僖二十八年鄭文公始朝於楚二十四年宋成公亦如楚自是以後鄭伯屢朝於楚而陳許諸君朝楚傳亦閒見至是則中國諸侯旅朝於楚直以事天子之禮事之矣迨昭九年而諸侯之大夫亦旅見於楚矣迨哀四年而晉亦京師楚矣凡此皆宋之盟實為厲階也



附錄  
左傳

楚屈建卒趙文子喪之如同盟禮也

十有二月甲寅天王崩

左傳

王人來告喪問崩日以甲寅告故書之以徵過也

也

譏其  
怠慢

乙未楚子昭卒

乙未距甲寅四十二日其為閏明矣而不書閏者  
見喪服之不數閏也齊景公葬書閏月明殺恩之  
非禮也

二十有九年春王正月公在楚

左傳二十九年春王正月公在楚釋不朝正于廟也楚

人使公親禭

諸侯有遣使賜禭之禮今楚欲遣使之比

公患之穆叔曰祓

殯而禭則布幣也

先使巫祓殯之凶邪而行禭禮與朝而布幣無異

乃使巫

以桃茢先祓殯

茢泰穰

楚人弗禁既而悔之

禮君臨臣喪乃祓殯

故楚悔之

公羊傳何言乎公在楚正月以存君也

穀梁傳

閔公也

閔公為楚所制故存錄

公如齊晉歲首闕朝正之禮亦多矣而經不書此獨書者何公迫於蠻荆久留以俟其葬而不能奔天王之喪故特書公所在以明其義以是知凡君在行國之守臣月朔必以公不朝正之故告於廟孔子修經以為常事而削之耳

附錄  
左傳

二月癸卯齊人葬莊公于北郭

兵死不入兆  
域故葬北郭

夏四月葬楚康王公及陳侯鄭伯許男送葬至于西門之外諸侯之大夫皆至於墓楚邾敖即位

邾敖康  
王子熊

康也

王子圍為令尹

王國康弟

鄭行人子羽曰是謂不宜必

代之昌松柏之下其草不殖

言楚君弱今尹強物不兩盛為昭元年國弑鄭

教起本

夏五月公至自楚

左傳

公還及方城季武子取卞

取卞邑以自益

使公治問

問公起居

公治季氏屬大夫

璽書追而與之

璽印也

曰聞守卞者將叛臣

帥徒以討之既得之矣敢告公治致使而退及舍而

後聞取卞

發書乃聞之

公曰欲之而言叛祇見疏也公謂

公治曰吾可以入乎

以季氏疏已故不敢入

對曰君實有國誰

敢違君公與公治冕服

以卿服賞之

固辭強之而後受公

欲無入榮成伯賦式微乃歸

詩邶風曰式微式微胡不歸式用也義取寄寓

之微陋勸公歸也

五月公至自楚公治致其邑于季氏而終

不入焉曰欺其君何必使余季孫見之則言季氏如

他日不見則終不言季氏及疾聚其臣曰

大夫家臣我死

必無以冕服歛非德賞也

言公畏季氏而賞其使非以我有德

且無使

季氏葬我

穀梁傳

喜之也

遠之蠻國喜得全歸

致君者殆其往而喜其反此

致君之意義也

公十一月如楚至夏始歸外辱於蠻荆內脅於彊

臣危殆甚矣故返國而以告於廟也

庚午衛侯衎卒

附錄左傳

葬靈王

不書魯不書

鄭上卿有事子展使印段往伯

有曰弱不可

印段年少官卑

子展曰與其莫往弱不猶愈乎

詩云王事靡盬不遑啓處

詩小雅盬不堅固也啓跪也言王事無不堅固故不

戰晚處

東西南北誰敢寧處

謂上卿

堅事晉楚以蕃王室

也王事無曠何常之有遂使印段如周

傳言周衰卑于晉楚

閻弑吳子餘祭

左傳

吳人伐越獲俘焉以為閻使守舟吳子餘祭觀舟

閻以刀弑之

公羊傳

閻者何門人也刑人也刑人則曷為謂之閻刑

人非其人也

以刑人為閻非其人

君子不近刑人近刑人則輕

死之道也

穀梁傳

閹門者也寺人也不稱名姓閹不得齊于人不稱其君閹不得君其君也禮君不使無恥不近刑人不狎敵不邇怨賤人非所貴也貴人非所刑也刑人非所近也舉至賤而加之吳子吳子近刑人也閹弑吳子餘祭仇之也

怨仇餘祭故弑之

閹刑人也謂之弑則其君也不曰其君賤閹也盜殺蔡侯申書殺閹書弑以食庶人在官者之祿也在禮國君不近刑人不邇怨據左氏閹乃越俘可



以知違禮之起禍矣

附錄

左傳鄭子展卒子皮即位

子皮罕虎代父為上卿

于是鄭饑而

未及麥民病子皮以子展之命餽國人粟

在喪故戶以父命

一鍾

六斛四斗曰鍾

是以得鄭國之民故罕氏常掌國政以

為上卿宋司城子罕聞之曰鄰于善民之望也

民亦望君

為善宋亦饑請于平公出公粟以貸使大夫皆貸司城

氏貸而不書

施而不德

為大夫之無者貸宋無饑人叔向

聞之曰鄭之罕宋之樂其後亡者也二者其皆得國

乎得國政民之歸也施而不德樂氏加焉其以宋升降

乎

升降隨宋盛衰

仲孫羯會晉荀盈齊高止宋華定衛世叔儀鄭公孫段

曹人莒人滕人薛人小邾人城杞

儀公羊作齊莒人下公羊穀梁有邾人

左傳晉平公杞出也故治杞

治理其地修其城

六月知悼子合

諸侯之大夫以城杞孟孝伯會之鄭子大叔與伯石

往子大叔見大叔文子

衛大叔儀

與之語文子曰甚乎其

城杞也子大叔曰若之何哉晉國不恤周宗之闕而

夏肄是屏

周宗諸姬也夏肄祀也肄餘也屏城也

其棄諸姬亦可知也

已諸姬是棄其誰歸之吉也聞之棄同即異是謂離

德詩曰協比其鄰昏姻孔云

詩小雅言王者和協近親則昏姻甚歸附也云

猶旋旋歸之

晉不鄰矣其誰云之

齊高子容與宋司徒見

知伯女齊相禮

子容高止也司徒華定也知伯荀盈也女齊司徒馬侯也

賓出司

馬侯言于知伯曰二子皆將不免子容專

自是也

司徒

侈皆亡家之主也知伯曰何如對曰專則速及侈將

以其力斃專則人實斃之將及矣

為此秋高止出奔燕昭二十年華定

出奔  
陳傳

穀梁  
傳

古者天子封諸侯其地足以容其民其民足以  
滿城以自守也杞危而不能自守故諸侯之大夫相  
帥以城之此變之正也

齊桓城衛而諸侯歸心其志公也晉平城杞而人  
疾其役其志私也平公內不能討衛亂外屈於楚  
以致中夏諸侯南鄉而旅見乃役十一國以城毋  
家動又不時諸侯之貳不亦宜乎

晉侯使士鞅來聘

左傳范獻子來聘拜城杞也公享之展莊叔執幣

公將以酬

賓

射者三耦

二人為耦

公臣不足取于家臣家臣展瑕展

王父為一耦公臣公巫召伯仲顏莊叔為一耦鄆鼓

父黨叔為一耦

言公室卑微公臣不能備于三耦

拜城杞且俾我歸杞田也以私役諸侯又有所請故特重其禮而遣聘焉

杞子來盟

左傳 晉侯使司馬女叔侯來治杞田使魯歸前侵杞田所歸少故不書

弗盡歸也晉悼夫人愠曰

夫人平公母杞女

齊也取貨先君

若有知也不尚取之

不尚叔侯之取貨

公告叔侯叔侯曰虞

虢焦滑霍揚韓魏皆姬姓也

八國皆晉所滅杜注焦在陝縣揚屬平陽郡

晉是以大若非侵小將何所取武獻以下兼國多矣

武公獻公晉始盛之君

誰得治之杞夏餘也而即東夷魯周公

之後也而睦于晉以杞封魯猶可而何有焉

何有盡歸之

魯之于晉也職貢不乏玩好時至公卿大夫相繼于

朝史不絕書府無虛月

無月不受魯貢

如是可矣何必瘠魯

以肥杞且先君而有知也毋寧夫人而焉用老臣

言先

君毋寧怪夫人之所為無用責我

杞文公來盟

魯歸其田故來盟

書曰子

賤之也

賤其用夷禮

杞子來盟為田故也晉治杞田非出於公義魯歸杞田亦非出於誠心故杞子親來要結之

吳子使札來聘

吳始聘吳始君臣竝見

左傳吳公子札來聘見叔孫穆子說之謂穆子曰子其

不得死乎好善而不能擇人吾聞君子務在擇人吾

子為魯宗卿而任其大政不慎舉何以堪之禍必及

子

為昭四年鑒  
牛作亂起本

請觀于周樂

魯以周公故  
有天子禮樂

使工為之

歌周南召南

此皆各依其本國  
歌所常用聲曲

曰美哉

美其  
聲

始基之

矣猶未也

猶有商紂  
未盡善也

然勤而不怨矣為之歌邶鄘衛

邶鄘孔氏穎達曰自紂城而北謂之邶自紂城而南  
謂之鄘今邶城在河南衛輝府東北鄘城在新鄉縣  
西武王克殷分其地為三監三監叛周公滅  
之以其地封康叔故三國盡被康叔之化

曰美哉

淵乎憂而不困者也吾聞衛康叔武公之德如是是



其衛風乎

武公康叔九世孫聽聲以為別故有疑言

為之歌王

王泰離也平王東遷

王政不行風俗下同于諸侯故不為雅

曰美哉思而不懼其周之東乎

為之歌鄭

詩第七

曰美哉其細已甚民弗堪也是其先

亡乎為之歌齊

詩第八

曰美哉泱泱乎大風也哉

泱泱弘大

之聲表東海者其大公乎國未可量也為之歌豳

詩第十五

豳杜注周之舊國在新平漆縣東北今陝西邠州東北有豳亭豳谷三水縣有豳城皆是也

曰美

哉蕩乎樂而不淫其周公之東乎

蕩乎蕩然也周公遭管蔡之變東征

三年為成王陳后稷先公不敢荒淫以成王業故言其周公之東乎

為之歌秦

詩第十一後仲

尼刪定  
故不同

曰此之謂夏聲夫能夏則大大之至也其周

之舊乎

秦本在西戎汧隴之西秦仲始有車馬禮樂去戎狄之音而有諸夏之聲故謂之夏聲及

襄公佐平王東遷而受其故地故曰周之舊

為之歌魏

詩第九魏姬姓國閔元年晉獻公滅

之曰美哉渢渢乎大而婉險而易行以德輔此則明

主也

渢渢中庸之聲婉約也險當為儉字之誤也

為之歌唐

詩第十

曰思

深哉其有陶唐氏之遺民乎不然何憂之遠也

晉本唐國

帝堯舊都

非令德之後誰能若是為之歌陳

詩第十二

曰國無

主其能久乎

淫聲放蕩無所畏忌故曰國無主

自鄆以下無譏焉

鄆第

十三曹第十四鄒在今河南密縣東北不復議論之以其微也為之歌小雅小雅小正亦樂

歌之常曰美哉思而不貳怨而不言其周德之衰乎猶

有先王之遺民焉為之歌大雅大雅陳文王之德以正天下曰廣

哉熙熙乎熙熙和樂聲曲而有直體論其聲其文王之德乎

雅頌所以詠盛德形容故但歌其美者不皆歌變雅為之歌頌頌者以其成功告于神明曰

至矣哉言道備直而不倨曲而不屈邇而不偏遠而不

攜遷而不淫復而不厭常日新哀而不愁樂而不荒用

而不匱廣而不宣不自顯施而不費取而不貪處而不

底

底滯也

行而不流五聲和八風平節有度守有序盛

德之所同也

頌有殷魯故曰盛德所同

見舞象箛南箛者

象箛舞所執南

箛以箛舞也皆文王之樂

曰美哉

美其容

猶有憾

文王恨不及已致大平

見舞

大武者

武王樂

曰美哉周之盛也其若此乎見舞韶濩

者

殷湯樂

曰聖人之弘也而猶有慚德

慚于始伐

聖人之難

也見舞大夏者

禹樂

曰美哉勤而不德

盡力溝洫勤也

非禹其

誰能修之見舞韶箛者

舜樂

曰德至矣哉大矣如天之

無不燭也如地之無不載也雖甚盛德其蔑以加于

此矣觀止矣若有他樂吾不敢請已其出聘也通嗣

君也

吳子餘祭嗣立

故遂聘于齊說晏平仲謂之曰子速納

邑與政無邑無政乃免于難齊國之政將有所歸未

獲所歸難未歇也故晏子因陳桓子以納政與邑是

以免于樂高之難

樂子雅高子尾難在昭八年

聘于鄭見子產如

舊相識與之縞帶子產獻紵衣焉

大帶也吳地貴縞鄭地貴紵故各獻

已所貴示不為彼貨利

謂子產曰鄭之執政侈

侈謂伯有

難將至矣

政必及子子為政慎之以禮不然鄭國將敗適衛說

遽瑗

遽伯玉

史狗

史朝之子文子

史鮒

史魚

公子荊

字南楚

公叔發

公叔文子

公子朝曰衛多君子未有患也自衛如晉將宿

于戚

戚孫文子之邑

聞鐘聲焉曰異哉吾聞之也辯而不德

辯猶爭也

必加于戮夫子獲罪于君以在此懼猶不足而

又何樂夫子之在此也猶燕之巢于幕上

言至危

君又

在殯而可以樂乎

衛獻公卒未葬

遂去之

不止宿

文子聞之終

身不聽琴瑟適晉說趙文子韓宣子魏獻子曰晉國

其萃于三族乎說叔向將行謂叔向曰吾子勉之君

侈而多良

謂多以惡人為良而善之

大夫皆富政將在家吾子好

直必思自免于難

公羊傳

吳無君無大夫

據向之會稱國

此何以有君有大夫賢

季子也何賢乎季子讓國也其讓國奈何謁也餘祭

也夷昧也與季子同母者四季子弱而才兄弟皆愛

之同欲立之以為君謁曰今若是迕而與季子國

起迕

也倉卒意

季子猶不受也請無與子而與弟弟兄迭為君

而致國乎季子皆曰諾故諸為君者皆輕死為勇飲

食必祝曰天苟有吳國尚速有悔于予身故謁也死

餘祭也立餘祭也死夷昧也立夷昧也死則國宜之

季子者也季子使而亡焉僚者長庶也即之

即位

使而反至而君之爾闔廬曰

闔廬謁之  
長子光

先君之所以

不與子國而與弟者凡為季子故也將從先君之命

與則國宜之季子者也不如不從先君之命與則我宜

立者也僚焉得為君子于是使專諸刺僚

專諸膳宰  
僚者炙魚

因進魚而刺之而致國乎季子季子不受曰爾殺吾君吾受



爾國是吾與爾為篡也爾殺吾兄吾又殺爾是父子

兄弟相殺終身無已也去之延陵

延陵吳下邑公子無去國之義故不

越竟終身不入吳國故君子以其不受為義以其不殺

為仁賢季子則吳何以有君有大夫以季子為臣則

宜有君者也札者何吳季子之名也春秋賢者不名

此何以名許夷狄者不壹而足也

當以漸進之故季子降字而名季

子者所賢也曷為不足乎季子許人臣者必使臣許

人子者必使子也

臣子尊榮莫不欲與君父共之春秋隆父子之親厚君臣之義故賢

者不名而札名  
以成尊于上也

穀梁傳

吳其稱子何也善使延陵季子故進之也身賢

賢也使賢亦賢也延陵季子之賢尊君也

以季子之賢吳子得

進稱子是尊君也

其名成尊于上也

札稱名稱吳子使本與楚子使椒來聘秦伯使術  
來聘同秦楚之使再而後書名稱使初通於魯魯  
猶忽之吳則晉以楚故數合諸侯以會之魯又嘗  
奉晉命特遣國卿偕衛卿以會之其重吳也久矣

故始通而舊史所書一同於秦楚耳先儒乃謂孔子特稱名以貶札而推原其故以為辭國而生亂不思札之辭國乃在聘魯之後而預貶之何義乎自盟宋以後中夏諸侯盡朝於楚吳楚方讎故歷聘上國以聯遠交且以觀諸侯之鄉背而其後楚求諸侯於晉以伐吳此當日邦交之情實也

秋九月葬衛獻公

齊高止出奔北燕

北燕始見經

左傳 秋九月齊公孫薑公孫竈放其大夫高止于北燕

止高厚之子薑子尾竈子雅

乙未出書曰出奔罪高止也

實放書奔所以

示罪 高止好以事自為功且專故難及之

穀梁傳

其曰北燕從史文也

以時有直言燕者故知從史文

據傳齊公孫薑公孫竈放高止于北燕君放大夫

可也臣放大夫不可以訓故以出奔書

冬仲孫羯如晉

左傳

冬孟孝伯如晉報范叔也

范叔士鞅此年夏來聘

附錄左傳

為高氏之難故高豎以盧叛

豎高止子

十月庚寅間

丘嬰帥師圍盧高豎曰苟使高氏有後請致邑齊人

立敬仲之曾孫鄰

敬仲高僕

良敬仲也

良猶賢也

十一月乙卯

高豎致盧而出奔晉晉人城緜而寘旗鄭伯有使

公孫黑如楚

黑子皙

辭曰楚鄭方惡而使余往是殺余

也伯有曰世行也

言世為行人

子皙曰可則往難則已何

世之有伯有將強使之子皙怒將伐伯有氏大夫和

之十二月己巳鄭大夫盟于伯有氏裨諶曰是盟也

其與幾何詩曰君子屢盟亂是用長

詩小雅

今是長亂

之道也禍未歇也必三年而後能紓然明曰政將焉

往裨譴由善之代不善天命也其焉辟子產舉不踰

等則位班也

班次應知政

擇善而舉則世隆也

為世所高

天又

除之奪伯有魄

喪其精神為子產驅除

子西即世將焉辟之天

禍鄭久矣其必使子產息之乃猶可以戾

戾定也

不然

將亡矣

日講春秋解義卷四十五